

Meeqqat atuarfianni immikkut atuartitsisarneq aamma allamik immikkut ittumik perorsaanikkut ikiorsiisarneq pillugit Namminersorlutik Oqartussat nalunaarutaat

Atuarfik pillugu Inatsisartut inatsisaanni nr. 15, 3. december 2012-imeersumi § 15, imm. 3 naapertorlugu aalajangersarneqarput:

Kapitali 1

Atorneqarfissaa siunertaalu

§ 1. Atuartunut, piginnaasamikkut ajornartorsiutaat ima ippata imaluunniit ima annertussuseqarpata immikkut tapersersorneqarnissaminut pisariaqartitaat nalinginnaasumik atuartitsinikkut pissarsiaritinneqarsinnaanatik, immikkut atuartitsisoqassaaq aamma allamik immikkut ittumik perorsaanikkut ikiorsiisoqassalluni.

Imm. 2. Atuartut atuarfinni imm. 1 naapertorlugu naammattumik annertussusilimmik ikiorserneqarsinnaanngitsut, Atuarfik pillugu Inatsisartut inatsisaanni § 25-mi atuartut angerlarsimaffini, kollegiani imaluunniit atuartunut nerisaqarfigiitigalugu inissiani immikkut aaqqissuussani ineqarnissamut neqeroorfigineqartassapput.

§ 2. Immikkut atuartitsisarnikkut aamma allamik immikkut ittumik perorsaanikkut ikiorsiisarnikkut siunertaavoq,

- 1) meeqqat atuarfiata siunertaa tunngaviilu naapertorlugit atuartup ineriartornerata ilikkariartorneratalu siuarsarneqarnissaa,
- 2) atuartup nalinginnaasumik atuartitsinermut peqataasinnaananut periarfissai sapinngisamik pitsaanerpaat, atuartup pisariaqartitaanut iluaqutaasut pilersissallugit, aamma
- 3) atuartup atuarfimmiit inuiaqatigiinnut, ilinniakkamut inuussutissarsiornermullu sammisamulluunniit allamut ikaarsaarnissaa tapersersussallugu.

Kapitali 2

Annertussusaa imarisaalu

§ 3. Immikkut atuartitsisarnermut aamma allamik immikkut ittumik perorsaanikkut ikiorsiisarnermut ilaapput:

- 1) Meeqqat atuarfianni atuartsissutini atuartsissutinillu qanitariissunik, atuartup ilikkagaqarsinnaanermigut periarfissai piginnaasaalu immikkut isiginiarlugit aaqqissuussanik, atuartsineq, tak. § 4, imm. 2.
- 2) Piginnaasaqariaatsinik suleriaatsinillu atuartsineq sungiusaanerlu, atuartup tarnikkut, timikkut, inooqataanikkut, attaveqatigiinnikkut, eqqarsarnikkut, misigissutsikkut maluginiutitigullu piginnaasaqarnissamut periarfissaanik ineriartortitsinerup siuarsarnissaa siunertaralugu.
- 3) Atuartunut angajoqqaanullu, ilinniartitsisunut allanullu, sulinerat atuartup ineriartorneranut annertuumik pingaarutilinnut, immikkut ittumik perorsaanermut siunnersuineq.
- 4) Atuartsinermut atortussat immikkut ittut teknikkikkullu iluaquersuutit atuartup atuartitaaneranut atatillugu pisariaqartinneqartut.
- 5) Atuarnermut atatillugu suliassatigut, inuttut naammassisassatigullu ajornartorsiutit qaangernissaannut tapersersuutaasinnaasumik atuartumut inuttut ikiorsiineq.
- 6) Inuiaqatigiinnut, ilinniakkamut, inuussutissarsiummut sammisamulluunniit allamut ikaarsaariarnermi atuartup namminersorsinnaaneranut imminullu ikiorsersinnaaneranut inuttut siunnersorneqarneq.

§ 4. Immikkut atuartsisarnerup aaqqissuunneqarnera allatullu immikkut ittumik perorsaanikkut ikiorsiineq, taamatuttaaq ilinniartitseriaatsinik, suleriaatsinik periutsinillu atuartup pisariaqartitaanik toqqaaneq, pisinnaasaanik ilikkarniarnikkullu piginnaasaqarfigeriigaanik aallaaveqassapput, tak. imm. 2., aaqqissuussinerlu atuartumut pitsaanerpaaqqullugu tamanna pissaaq atuartoq sapinngisaq tamaat annerpaamik peqataatillugu atuartullu kissaatai eqqarsaatigalugit.

Imm. 2. Atuartup ilikkarniarneranut piumassaqaatit ilaatigut tassaapput suliassatigut, naammassisassatigut inuttullu nukittuffit. Piginnaasaqarfii nalilerneqassapput, Atuarfik pillugu Inatsisartut inatsisaanni § 38, imm. 1, nr. 4 naapertorlugu perorsaanermut aamma tarnip pissusaanut tunngasunik siunnersuinerfik ingerlatsiffiusumit (Siunnersuisarfik). Tamanna perorsaanikkut aamma tarnip pissusaanut tunngasunik nalilersuinikkut pissaaq, ajornanngippat meeqqanut tarnip nakorsaanik peqqinnissaqarfimmiluunniit sulisunik allanik suleqateqarnikkut.

§ 5. Immikkut atuartsineq ilinniartitsisunit immikkut atuartsinermut ilinniarsimasunit allatulluunniit piginnaasanik pisarialinnik peqartunit ingerlanneqartassaaq.

Imm. 2. Perorsaatut allallu naleqquttumik ilinniagaqarsimasut atuartut angerlarsimaffini, ilinniartut najugaqarfiini atuarfinnilu nerisaqarfutigisuni immikkullu perorsaanikkut suliaqarfiusuni perorsaanikkut suliniuteqarsinnaapput.

§ 6. Immikkut atuartsineq aamma allamik immikkut ittumik perorsaanikkut ikiorsiisarneq ima iliorluni pisassaaq:

- 1) Inimi atuarfiusumi taassumaluunniit avataani kisimiilluni tapersersorneqarnikkut.
- 2) Inimi atuarfiusumi taassumaluunniit avataani eqimattami tapersersorneqarnikkut.
- 3) Akunnerni piffissanilu ataasiakkaani kisimiilluni atuartinneqarnikkut.
- 4) Piffissani sivikitsukkaani atuartsissutini tamarmiusuni kisimiilluni atuartinneqarnikkut.
- 5) Akunnerni piffissanilu ataasiakkaani eqimattami atuartinneqarnikkut.
- 6) Piffissami sivikitsumi atuartsissutini tamarmiusuni eqimattami atuartinneqarnikkut.
- 7) Atuarneq tamaat atuarnerulluunniit annersaani atuaqatigiinni atuartunut immikkut

atuartinneqarnissamut allatulluunniit immikkut ittumik perorsaanikkut ikiorserneqarnissamut pisariaqartitsisunut pilersinneqarsimasumi atuartinneqarnikkut (specialklassi).

8) Atuarfinni immikkut ittuni atuarfiilluunniit immikkoortortaani immikkut pilersitani atuartinneqarnikkut.

9) Ulluunerani aamma ulloq unnuarlu neqeroorutini, Naalakkersuisut pilersitaanni akuerisaanniluunniit atuartinneqarnikkut.

Imm. 2. Immikkut atuartsineq aamma allamik immikkut ittumik perorsaanikkut ikiorsiisarneq atuartsissutini ataasiakkaani, atuarnep ilaani imaluunniit atuarnermi tamarmiusumi pisinnaavoq. Immikkut atuartsineq aamma allamik immikkut ittumik perorsaanikkut ikiorsiisarneq meeqqat atuarfiani atuartsissutaasuni tamani atuartsissutinilu qanitariissuni tamarmiusuni atorineqarsinnaavoq.

Imm. 3. Immikkorluinnaq pequtissaqanngippat atuartoq sivikitsuinarmik kisimiisillugu atuartinneqartariaqarpoq taamaallaallu piginnaasamigut ajornartorsiutai ima ippata atuaqatigiinnut specialklassimulluunniit akulerutsinneqarsinnaanani, imaluunniit pissutsit immikkorluinnaq ittut pequtaappata.

Imm. 4. Ilinniartitaanermut, Kultureqarnermut, , Ilisimatusarnermut Ilageeqarnermullu Naalakkersuisoqarfik immikkut atuartsineramik aamma allamik immikkut ittumik perorsaanikkut ikiorsiissutinik imm. 1-imi pineqartunit allaanerusunik akuersissuteqarsinnaavoq.

Kapitali 3

Ingerlatseriaaseq ingerlaneralu

§ 7. Atuaqatigiit ilinniartitsisuaata, atuartulluunniit ilinniartitsisuisa allat imaluunniit atuarfimmi sulisut meeqqamut attuumassuteqartut allat iliuuseqarnerisigut perorsaanikkut tarnikkullu atukkat atuarfup pisortaannut perorsaanikkut tarnillu pissusaanik naliligassatut innersuussutigissavai, imaappat:

1) atuartup atuartulluunniit arlallit immikkut atuartitaanissamut pisariaqartitaat aamma immikkut ittumik tapersorsorneqarnissamut pisariaqartitaat nalinginnaasumik atuartsinerup iluanni atuartitseriaatsinik atuartunut tulluussaannikkut, eqimattakkaartitsinikkut eqaatsumilluunniit pilersaarusiornikkut ingerlanneqarsinnaanngippata, imaluunniit

2) atuartup atuartulluunniit arlallit ataatsimut isigalugu inissisimanerat annertuumik ernumanartoqartinneqarpat.

Imm. 2. Innersuussusiortoqartinagu atuartup atugarisai atuartulluunniit pineqartut atugarisaat pillugit, atuartunut pineqartunut, pineqartut angajoqqaavinut, atuartullu pineqartut ilinniartitsisuinut pissutsit oqaloqatiginnissutigineqareersimassapput.

Imm. 3. Innersuussineq paasissutissanik makkuninnga minnerpaamik imaqassaaq:

- 1) pissutsit ajornartorsiutaasut ikiorserniarlugit atuartorlu pineqartoq imaluunniit pineqartut ineriartornerat ilikkariartornerallu siuarsarniarlugu sunik aallartitsisoqareersimanersoq,
- 2) atuartup atugarisaasa oqaloqatigiissutigisarsimaneramik inerniliineq, tak. imm. 2, aamma
- 3) apeqqutit tigussaasut perorsaanikkut tarnillu pissusaanut tunngassuteqartut, pissutsinik innersuussinermi tunngaviusunik aallaaveqartut .

§ 8. Atuartup atuartullu angajoqqaavisa nammineerlutik atuaqatigiit ilinniartitsisuat qinnuigisinnaavaat, atuartup atugaanut perorsaanermut tarnillu pissusaanut tunngasunut atatillugu, perorsaanikkut

tarnikkullu atuartup pisariaqartitaasa nalilersorneqarnissaat siunertaralugu.

Imm. 2. Qinnuiginninneq tunngavigalugu atuaqatigiit ilinniartitsisuat tamanna pillugu inassuteqaateqassaaq, § 7, imm. 2 aamma 3 takuuk.

§ 9. Atuarfiup pisortaa atuaqatigiit ilinniartitsisuata inassuteqaataa, angajoqqaat atuartulluunniit qinnuiginninneraneersinnaasoq tunngavigalugu perorsaanermut tarnillu pissusaanut tunngasumik Siunnersuisarfimmi naliliisoqarnissaanik innersuussissaaq. Kiisalu atuarfiup pisortaa perorsaanermut tarnillu pissusaanut tunngasunik pissutsit paasissutissat atuartup atuarfimmi allatsinnerata nalaani pigineqartut tunngavigalugit nalilersuisoqarnissaanut innersuussisinnaavoq.

§ 10. Perorsaanermut tarnillu pissusaanut tunngasunut nalilersuinissamut innersuussineq atuaqatigiit ilinniartitsisuata innersuussinerata saniatigut peqqinnissaqarfimmiit oqaaseqaammik ilaqartassaaq, atuartup imaluunniit atuartut pineqartut peqqissutsimikkut inissisimanerat ineriartornerallu pillugit, tamatumunnga ataavartumik nappaatit, tappissusiat tusaasinnaassusiallu ilanngullugit.

Imm. 2. Angajoqqaallu tamatumunnga akuersisimappata isumaginnittoqarfimmiit oqaaseqaammik ilanngussisoqarsinnaavoq.

§ 11. Siunnersuisarfiup atuarfiup pisortaata inassuteqaataa tunngavigalugu perorsaanikkut tarnillu pissusaanut tunngasutigit pissutsit innersuunneqartut nalilersortittassavai, Siunnersuisarfiup naliliinermini atuartumut atuartunulluunniit pineqartunut pitsaanerusoq aallaavigisassavaa.

Imm. 2. Siunnersuisarfik atuarfiup pisortaanut allaganngorlugu oqaaseqaateqassaaq, perorsaanikkut tarnillu pissusaanut tunngasutigit nalilersuineq tunngavigalugu. Ilutigitillugu taassuma assilinerangajoqqaanut atuartumullu nassiunneqassaaq.

Imm. 3. Siunnersuisarfik naliliippat pissutsit innersuunneqartut atuartumut ataatsimut arlalinnulluunniit immikkut ittumik atuartitsinikkut immikkulluunniit perorsaanikkut ikiorsiinikkut pissusissamisoornerpaamik ikiorserneqarsinnaasut, oqaaseqaat immikkut atuartitsisoqarnissaata ilusissaanik annertussusissaanillu siunnersuummik imaqaassaaq, pingaarnertut siunertaralugu nalunaassallugu atuartitsineq tamarmi atuartitsinerulluunniit annersaa immikkut atuartitsinerunersoq imaluunniit immikkut ittumik perorsaanikkut ikiorsiinerunersoq.

Imm. 4. Siunnersuisarfiup nalilerpagu pissutsit innersuunneqartut immikkut atuartitsinikkut immikkulluunniit perorsaanikkut ikiorsiinikkut pissusissamisoornerpaamik ikiorserneqarsinnaanngitsut, oqaaseqaat pissutsit qanoq pitsaanerpaamik ikiorserneqarsinnaanerinin siunnersuinermik ilaqartinneqassaaq.

§ 12. Siunnersuisarfiup allaganngorlugu oqaaseqaataa tunuliaqutaralugu atuarfiup pisortaa aalajangiissaaq perorsaanikkut suliniutissanik aallartitsisoqassanersoq, aammalu taakkua qanoq iluseqartinneqassanersut, perorsaanikkut tarnillu pissusaanut tunngasutigit naliliisimanermik tunngaveqartunik, tamatumunnga ilanngullugu immikkut atuartitsinermik aamma allanik immikkut perorsaanikkut ikiorsiissutaasussanik aallartitsisoqassanersoq.

Imm. 2. Immikkut atuartitsinermik aallartitsinermi, aamma allanik immikkut perorsaanikkut ikiorsiissutinik aallartitsinermi, atuaqatigiit ilinniartitsisuata aamma ilinniartitsisut tamatumunnga attuumassuteqartut atuartup angajoqqaavinik atuartumillu isumasioqateqareernikkut, atuartunut

ataasiakkaanut atuartitsinissamut pilersaarummik suliaqassapput.

Imm. 3. Atuartumut naatsorsuussamik atuartitsinissamut pilersaarusiaq minnerpaamik makkuninnga imaqassaaq:

- 1) Atuartup tunngavigisai pisariaqartitaalu, atuartup nukittuffi pingaartillugit.
- 2) Paasissutissat paasisallu pissutsinut tunngavigisanut atugaasunullu tunngasut, atuartup ineriartoqqinnissamut periarfissaanut pingaaruteqartut.
- 3) Siunertat, anguniakkat anguniakkallu immikkoortitaarneri immikkut atuartitsinermi atugassarititaasut allamillu immikkut ittumik perorsaanikkut ikiorsiineq, kiisalu imarisai, sivilissusii, atuartitsinermi periaasissat iluseritassat atortussallu.
- 4) Immikkut atuartitsinerup allamillu immikkut ittumik perorsaanikkut ikiorsiissutit qanoq nalilersorneqartarnissaat uppersaasarsortarnissaallu.

§ 13. Atuartoq, atuarfiup ingerlaannartumik iliuuseqarfigisariaqagaani immikkut ajornartorsiornartumik inissisimappat, immikkut atuartitsineq aamma allamik immikkut perorsaanikkut ikiorsiineq atuartup atugai pillugit atuartumik, angajoqqaavini atuartullu ilinniartitsisui oqaloqateqarnerup kingornatigut qaqutigoorluartumik atuarfiup pisortaanit erniinnartumik aallartinneqarsinnaapput.

Imm. 2. Angajoqqaat imm. 1. naapertorlugu atuartumut atugassarititaasunik oqaloqatiginnissuteqarumanngippata, immikkut atuartitsineq imaluunniit allamik immikkut perorsaanikkut ikiorsiineq atuartumik ilinniartitsisui oqaloqateqareernerup kingorna atuarfiup pisortaanit erninnaartumik aallartinneqarsinnaapput.

Imm. 3. Imm. 1. aamma 2. naapertorlugit erninnaartumik immikkut atuartitsinermi immikkulluunniit perorsaanikkut ikiorsiinermi aallartitsineq ullunit atuarfusunit 15-init katillugu sivilissusissatut nalilerneqarpat, angajoqqaat allakkatigut nalunaarfigineqassapput piaarnerpaamillu § 7, imm. 3 naapertorlugu innersuussusiortoqassaaq.

§ 14. Immikkut atuartitsineq aamma allamik immikkut perorsaanikkut ikiorsiineq aallartinneqarsimasoq, atuartullu tamatumani pissarsiarisai ingerlaavartumik nalilersorneqartassapput, atuartup siumut sammisumik pisariaqartitaasa nalilersorneqarnissaannik siunertaqartumik, tak. imm. 2-3.

Imm. 2. Atuartup atuaqatigiinnut ilinniartitsisua ilinniartitsisullu allat attuumassuteqartut akuttunerpaamik qaammatit allortarlugit perorsaanikkut pilersaarusiornermut ataatsimeeqatigiittassapput, tassanilu ataasiakkaanut atuartitsinermit pilersaarutit aqqissuunneqartassapput nalilersorneqartarlutillu.

Imm. 3. Atuarfiup pisortaa, atuartup atuaqatigiinnut ilinniartitsisua ilinniartitsisullu attuumassuseqartut allat ukiup atuarfusup qiteqqunnerani sullissinermit ataatsimiinneq ingerlattassavaat, tassanilu atuartumik atuartitsinerup ingerlanera nalilersorneqartassalluni.

§ 15. Ingerlaavartumik nalilersuisarnek ingerlanneqartassaaq sapinngisamik atuartup atuartullu angajoqqaavisa sukumiisumik peqataatinnerisigut.

Imm. 2. Siunnersuisarfik pisariaqartitsineq naapertorlugu isumasiorneqartarsinnaavoq.

Imm. 3. Nalilersuinermit atatillugu peqqinnissaqarfimmiit, atuartup peqqissutisimigut ineriartorneranut tunngasutigut ilassutitut oqaaseqaatinik pissarsinartoqarsinnaavoq. Angajoqqaat tamatumunnga akuersisimappata isumaginnittoqarfimmiit aamma oqaaseqaateqartitsisoqarsinnaavoq.

Imm. 4. Atuarfiup pissusissamisoortutut isigippagu Siunnersuisarfiup, peqqinnissaqarfiup inunnik isumaginnittoqarfiup oqartussallu susassaqtut attuumassutillit allat sinniisui aamma nalilersuinnermut akulerunneqarsinnaapput.

§ 16. Immikkut atuartitsinerup aamma allamik immikkut ittumik perorsaanikkut ikiorsiisarnerup suussusissaa annertussusissaalu Siunnersuisarfiup minnerpaamik ukiumut ataasiarluni nalilertassavaa. Tamanna ingerlaavartumik nalilersuisarnikkut pisassaaq, tak. §§-it 14 aamma 15. Atuarfiup pisortaata qulakkiissavaa atortussat atuartup killiffianik atuartitsinermullu pilersaarutitut nassuiaasut Siunnersuisarfiup pissarsiarissagai.

§ 17. Atuarfiup pisortaata kommunalbestyrelsip immikkut atuartitsisarnermut killiliussaasa iluanni aalajangertassavaa ingerlaqqinnissaq, allannguuteqartitsinissaq imaluunniit immikkut atuartitsinerup aamma immikkut ittumik perorsaanikkut ikiorsiisarnerup aallartinneqarsimasup unitsinneqarnissaa. Tamanna pisassaaq immikkut atuartitsisarneq aamma immikkut ittumik perorsaanikkut ikiorsiisarneq pillugit Siunnersuisarfimmit nalilersuisimaneq tunngavigalugu.

Kapitali 4

Atuartunut ataasiakkaanut immikkut aaqjissuussinerit

§ 18. Atuarfiup pisortaata atuaqatigiit ilinniartitsisuannit inassuteqaat angajoqqaanit akuersarneqarneratigit atuartumillu tamanna pillugu oqaloqatiginninnerup kingorna, atuartup immikkut atuartitaanera imaluunniit immikkut ittumik perorsaanikkut atuartumut ikiorsiissutit allannguuteqartissinnaavai, atuartitsinermut allamut imaluunniit ikiorsiissutitut allanut, piffissami immikkut sivisussusilikkami. Allanguineq atuartitsissutitut ataasiakkaanut, arlaqartunut atuartitsissutinulluunniit qanitariissunut tunngasuusinnaavoq, piffissani aalajangersimasuni siunertalimmik allanguiffiusussatut isigineqartuni atuuttoq. Allanguineq ukiumut atuarfiusumut tamarmiusumut atuutissappat, atuarfiup pisortaata allanguinissamut pilersaarut allanguineq pitinnagu Siunnersuisarfimmut oqaaseqaateqarfigeqqullugu saqqummiutissavaa.

§ 19. Atuartoq immikkut atuartitaanermik imaluunniit allamik immikkut ittumik perorsaanikkut ikiorsiissutaasumik aaqjissuussiffigineqarsimappat, atuartitsissutitut ataasiakkaanut, arlaqartunut atuartitsissutinulluunniit qanitariissunut tunngatillugu, atuarfiup pisortaa uppersaasiinnermut aamma atuartup angusaanut karakteriliinnermut taarsiullugu allakkatigit oqaaseqaammik suliaqarsinnaavoq. Oqaaseqaat immikkut atuartitsinermi anguniagaasunik atuartup qanoq angusaqarsimaneramik tunngaveqassaaq, takukkit § 12, imm. 2 aamma 3.

Imm. 2. Uppersaasiineq aamma atuartup angusaanut karakteriliineq allakkatigit oqaaseqaammik taarserneqarpata, imm. 1 naapertorlugu, taanna atuartup inaarutaasumik soraarummeernermit uppersaataani ilanngunneqassaaq.

§ 20. Atuarfiup pisortaata, tak. imm. 2 aamma 3 immikkut atuartitsinermut imaluunniit allatut immikkut ittumik ikiorsiissutaasutut aallartinneqarsimasunut naapertuunnerpaatut isigineqarpat, Meeqqat Atuarfiat pillugu Inatsisartut inatsisaanni aalajangersakkat aamma aalajangersakkat taanna

tunngavigalugu suliarineqarsimasut naapertorlugit, piffissamut atuarfiusussamut, ukiup atuarfiusup sivilissusissaanut, atuartitaanerup pilersaarusiorneqarneranut aaqqissuussaananullu aamma alloriarfinni ataasiakkaani atuartitsinermut aalajangersakkat saneqqussinnaavai.

Imm. 2. Saneqqutsineq meeqqap soqutigisaanut iluaqutaanerpaassaaq imatullu aaqqissuunneqassanngilaq tamanna atuartup ingerlaqqilluni ilinniagaqarsinnaananeranut kinguneqarnerluutaasinnaalluni.

Imm. 3. Atuarfiup pisortaata saneqqutsinissamik aalajangernissamut isummernissaa pitinnagu, atuarfiup pisortaata atuartoq, angajoqqaat aammalu suleqatit attuumassutillit allat tamanna pillugu oqaaseqaateqarnissamik piumaffigissavai.

Imm. 4. Saneqqutsineq nalilersorneqarlunilu uppersaasorsorneqassaaq, tak. §§ 14-16.

Kapitali 5

Atuarfimmut allamut nuunneq

§ 21. Atuartoq immikkut atuartinneqartoq imaluunniit immikkut ittumik perorsaanikkut ikiorsiissutaasunik aaqqissuussiffigineqarsimasooq atuarfimmut allamut nuuppat, atuarfik taanna piaartumik atuartoq pillugu paasissutissanik atuartumut tunngassuteqartunik tamanik nassiussaqaassaaq, tamatumunga ilanngullugu atuartumut iliuusissatut pilersaarusiaq, atuartumut tunngasumik mappi, atuartitsinermut pilersaarutit aamma nalilersuisarsimanerit. Atuarfiup qimalikkap atuarfillu tikitassap atuartoq atuarfimmut allamut nuutsinnagu, atuartup angajoqqaavi atuartorlu isumasiorlugit atuartup atuarnerminik ingerlaqqinnissaa piareersassavaat qulakkiissallugulu atuarfimmi tikitamini atualernerminiit immikkut atuartitsineq imaluunniit immikkut ittumik perorsaanikkut ikorsiineq pisariaqartitani nangillugu pissarsiarisassagaa.

Kapitali 6

Atuartuunerup naanera

§ 22. Atuartuuneeq naappat atuarfiup inassuteqaataasimasut kommunimilu perorsaanikkut tarnillu pissusaanut tunngasuni innersuussinerit kiisalu ukiuni tallimani atuartitaanerup pilersaarutit toqqortarissavai, tamatumalu kingorna Siunnersuisarfimmut utertillugit.

Imm. 2. Atuartoq atuartitaanerup naanerani sulii immikkut ittumik ikiorserneqartarnissamik pisariaqartitsippat, atuarfiup pisortaata akisussaaffigaa atuartup angajoqqaavisalu tamanna pillugu periarfissanik paasissutissinneqarnissaat. Atuarnerup ingerlaqqiffigisinnaasaanik, siunnersorneqarnissamut pisinnaatitaaffiinik inuussutissarsiornikkullu periarfissaanik.

Kapitali 7

Maalaaruteqarneq

§ 23. Nalunaarut una malillugu atuarfinni ataasiakkaani aalajangiunneqarsimasut aalajangiinerup nalunaarutigineraniit sapaatik akunneri sisamat qaangiutsinnagit kommunalbestyrelsimut maalaarutigineqarsinnaapput.

Kapitali 8
Atortuulerfia

§ 24. Nalunaarut atuutilissaaq 1. agusti 2018.

Imm. 2. Ilutigitillugu meeqqat atuarfianni immikkut atuartitsisarneq aamma allamik immikkut ittumik perorsaanikkut ikiorsiisarneq pillugit Namminersornerullutik Oqartussat nalunaarutaat nr. 22, 23. juuli 1998-imeersoq atorunnaarsinneqassaaq.

Namminersorlutik Oqartussat, ulloq 8. december 2017

Doris J. Jensen

/

Lone Nukaaraq Møller

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut